

նած տեղագրական քարտէսին վրայ, նոյն տեղը ցոյց կու տայ հրւ.—արեմուտքը: Ուրիշ երկու քարտէսներ եւս միւսնոյն տեղը կը նշանակեն Այնքեարիմը:

Զ. 1384ին, Նիֆոս Ֆրեաֆոպոսի, Այնքեարիմը կը նկարագրէ հետեւեալ կերպով. «Զաքարիայի տան տեղւոյն վրայ շինուած է եկեղեցի մը Կոստանդիանոսի մօր Հեղինէի կողմէն: Այս տեղւոյն մօտիկ կայ աղբիւր մը, հո՛ս էր որ Եղիսարեթը ընդառաջեց Ս. Կուսին, երբ վերջինս կ'այցելէր իրեն. շինուած եկեղեցին կամարակապ էր, բայց հիմակ այլք գոմի վերածած են զայն. հո՛ս է նաև այն վիճը, որ Բեթղեհէմի մանկանց կոտորածի ժամանակ, ինքն իրեն բացուեցաւ, և Եղիսարեթ պահեց իր մանուկը հոն, և վէմը այսպէս կիսաբաց մնաց մինչև այսօր: Հովիտին միւս կողմը, գրեթէ զիմացը, կայ նաև խիստ գեղեցիկ եկեղեցի մը, որ շինուած է նոյնպէս Ս. Հեղինէէն, հո՛ս է որ ծնած է Յովհ. Մկրտիչ եւ ուր կը բնակէին Զաքարիա եւ Եղիսարեթ . . . »:

Է. Անցնինք այժմ վանահայր Կրեդիկոսի վկայութեան (1400): Ան Այնքեարիմի Յովհ. Ծոննդեան եկեղեցին յիշելէ յետոյ, Հայոց վանքին նկատմամբ կու տայ հետեւեալ վկայութիւնը. «Աւելի հեռուն երրորդ լեռան վրայ կը գտնուի Հայոց վանքը, որուն եկեղեցւոյն մէջ, աջակողմը, սեղանին մօտ, լեռը երկու կանգուն ձևըքուած և նորէն մօմի նման միացած է. երբ Հերովդէս Բեթղեհէմի մանուկները կը կոտորէր, Եղիսարեթը Յովհ. Մկրտիչը առաւ և լեռը փախաւ և ըսաւ,— Ով լեռ, ընդունէ՛ մայրը եւ գաւակը, և լեռը բացուեցաւ»:

Ը. 1422 ին, Յովհաննէս Բոյոնըր կ'այցելէ և կը գրէ. «Հոն մին միւսին վրայ, երկու եկեղեցիներ շինուած են, վերի եկեղեցին գրեթէ աւերակ է, վարի եկեղեցին մէջ, պատին ազուցած են այն վէմը, ուր փոքրիկն Յովհաննէս պահուած մնաց մանկանց կոտորածին ժամանակ»: Միւսնոյն դարուն վերջերը, Ֆրանսուս Մարիսուս, Ս. Երկրին մեծաւորը (Custode) այն եկեղեցւոյն վրայ կը գրէ հետեւալը. «Իմ առաջին պաշտօնավարութեանս (1485), եկեղեցին տակաւին կանգուն էր ամբողջութեամբ, բայց յետոյ փլած է և չէ վերաշինուած, բայց սեղանները իրենց տեղերը կը մնան . . .»: Իսկ 1483ին, Յովհաննէս Տրոս և այլք կը գրեն թէ այս աւերումներուն հակառակ, ուխտաւորք երկար ժա-